

Las partidas burgaisas n'èn betg unidas pertutgant la relaziun da l'agricultura grischuna cun la Uniun europeica.

MAD



Ils liberals e la sanestra procuran per ina decisiun stretga

Nagina iniziativa chantunala a favur dad ina cunvegna cun la UE

■ (anr/ac) Il cussegl grond ha refusà l'incumbensa dad inoltrar ina iniziativa dal chantun per repreneur las tractativas davart la cunvegna agrara cun la Uniun europeica. La relaziun da la Svizra cun la Uniun europeica (UE) ha fatschentà il cussegl grond. El ha tractà l'incumbensa da *Jon Pult* (ps, Cuira) che aveva pretendì ina iniziativa dal chantun per intimar la confederaziun da repreneur las tractativas davart ina cunvegna agrara cun la UE. Quella incumbensa ha il cussegl refusà stretg cun 51 vers 49 vuschs. *Jon Pult* ha argumentà avant il cussegl cun il status quo na betg cuntentaivel per l'agricultura indigena e cun dischavantatgs per il turissem grischun. Bain ha el concedì tschertas grevazzas per l'agricultura indigena causa ina fiera liberalisada. El è dentant da l'avis ch'i saja impurtant da contractar cun la UE per instradar mesiras da sustegn per l'agricultura. Opposiziun envers l'argumentaziun dal president da la ps è vegnida da diversas varts. La deputada *Margrit Darms-Landolt* (pcd, Foppa) ha fatg at-

tent a las sperditas finanzialas che smanaschan a l'agricultura entras in eventual martgà liberalisà cun la UE. Ella ha punctuà che gist quellas sperditas annuallas da bunamain 1,5 milliardas francs periclitescian l'agricultura e hajan gist intimà il parlament federal da sistir las tractativas cun la UE. *Agnes Brandenburger* (pps, Tschintg Vitgs) ha renfatschà a la ps d'avair donnegià il turissem cun cumbatter il gieus olimpics en il chantun Grischun per ussa vulair promover quella sparta sin donn e cust da l'agricultura. Ulteriurs votums han visà als gronds dischavantatgs dal turissem indigen, betg per via dals pretschs da las mangiativas, mabain en connex cun la lescha da lavur e las pajas.

Liberals èn s'unids cun la sanestra

Sustegn per l'incumbensa da la vart sanestra è vegnì da la Partida liberaldemocrata. Il deputà *Rudolf Kunz* (pld, Cuira) ha vesì en la incumbensa da *Jon Pult* in confessal liberalissem. Il chau da la fracziun ha

proponì al cussegl da sustegnair l'incumbensa. Or da sia vista èsi meglier dad agir proactivamain enstagl da spetgar enfin che la UE sforzia dad agir. Per el sa cumporta l'argumentaziun dal deputà da la ps senz'auter cun l'argumentaziun da la regenza che ha dentant proponì al cussegl da refusar l'incumbensa. Il cusseglier guvernativ *Hansjörg Trachsel* ha argumentà cun la valur generala da l'iniziativa dals chantuns che possedia sulet valur da petiziun tar la confederaziun. Bain è *Trachsel* da l'avis ch'ina cunvegna cun la UE ed il martgà da mangiativas liberalisà na sa laschia betg impedir en l'avegnir. Per aspects tactics e politics na vesia il cusseglier guvernativ dentant per betg prudent d'inoltrar ina iniziativa. Ed el ha avertì il cussegl grond da na sa maschadar en la politica federala. Il chantun sa dostia da sia vart er envers intervenziuns federalas. Sulet ina pitschna maioritad da deputadas e deputads ha laschà persvader ed ha refusà l'incumbensa cun sulet trais vuschs differenza.